



01
2392

Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj: 11-04/03-34-24273-36/26
Sarajevo, 01. 06. 2026. godine

SKUPŠTINA KANTONA SARAJEVO

n/r Elvedin Okerić, predsjedavajući Skupštine Kantona Sarajevo

Predmet: Odgovor na zastupničku inicijativu, *dostavlja se*

ZASTUPNIČKA INICIJATIVA:

Zastupnica Jelena Pekić je u skladu s članom 212. stav (2) Poslovnika Skupštine Kantona Sarajevo („Službene novine Kantona Sarajevo“, broj: 41/12- Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24), u okviru 30. radne sjednice Skupštine Kantona Sarajevo uputila zastupničku inicijativu: „Za uspostavljanje obaveznog nadzora vozača i tehničke ispravnosti autobusa prilikom organizovanja školskih ekskurzija i izleta.

OBRAZLOŽENJE: „U cilju povećanja sigurnosti učenika tokom organizovanih školskih putovanja, podnosim inicijativu da Ministarstvo za odgoj i obrazovanje Kantona Sarajevo, u saradnji sa Upravom policije Kantona Sarajevo, uspostavi obavezan i redovan mehanizam kontrole vozača i vozila prije realizacije ekskurzija, izleta i drugih organizovanih prijevoza učenika.

Predlažem da svaka obrazovna ustanova bude obavezna da nadležnu policijsku upravu obavijesti o planiranom putovanju najmanje sedam dana prije polaska, kako bi se omogućilo pravovremeno organizovanje provjera.

Navedene provjere bi podrazumijevale:

- obavezno alkotestiranje vozača autobusa na dan polaska;
- provjeru eventualnog prisustva psihoaktivnih supstanci kod vozača;
- kontrolu tehničke ispravnosti autobusa kojim se vrši prijevoz učenika.

Smatram da bi ovakav sistem preventivnog djelovanja doprinio sigurnosti djece u saobraćaju i smanjenju rizika od nesreća.“

ODGOVOR: Ministarstvo za odgoj i obrazovanje Kantona Sarajevo (u nastavku teksta: Ministarstvo) pozdravlja inicijativu zastupnice Jelene Pekić za provođenje preventivnih aktivnosti kako bi se osigurala bezbjednost učenika prilikom realizacije školskih ekskurzija i izleta.

Ističemo da osiguranje bezbjednosti i dobrobiti učenika tokom organizacije i realizacije školskih ekskurzija, studijskih putovanja i izleta predstavlja prioritet Ministarstva.

Pitanje organizacije i realizacije izleta, studijskih posjeta, ekskurzija i drugih oblika odgojno-obrazovnog rada koje se izvode van ili unutar objekata osnovnih i srednjih škola Kantona Sarajevo, uređena su Pravilnikom o realizaciji škole u prirodi, izleta, studijskih posjeta, ekskurzija, kampovanja/logorovanja, društveno korisnog učenja i drugih oblika odgojno-obrazovnog rada u osnovnoj i srednjoj školi („Službene novine Kantona Sarajevo“, broj: 34/24, 10/25 i 45/25) (u nastavku teksta: Pravilnik).

S tim u vezi, informišemo Vas sljedeće:

- Član 3. tačka b) Pravilnika propisuje da je direktor škole odgovorno lice za realizaciju svih oblika odgojno-obrazovnog rada koji su predmet ovog pravilnika, kao organ rukovođenja škole, čija su prava i obaveze definisane Zakonom o odgoju i obrazovanju u osnovnoj i srednjoj školi u Kantonu Sarajevo ("Službene novine Kantona Sarajevo", broj 27/24).
- Član 7. stav (1) Pravilnika propisuje da škola ima obavezu da, pri realizaciji određenog oblika odgojno-obrazovnog rada, osigura zaštitu najboljeg interesa učenika i da vodi brigu usmjerenu ka dobrobiti njegovog fizičkog i mentalnog zdravlja i sigurnosti.
- Član 86. stav (2), tačka l) Pravilnika propisuje aktivnosti na osiguranju sigurnosti, a jedna od navedenih aktivnosti je obaveza škole i Agencije da osiguraju visok kvalitet usluga prijevoza, smještaja, ishrane, te drugih usluga u sklopu turističkog paket/aranžmana.
- Pravilnik propisuje minimalne zahtjeve u vezi sa putovanjem učenika na izlete, studijska putovanja i ekskurzije, pa tako stav član 89. stav (2) propisuje da sigurno putovanje, podrazumijeva obavezu Agencije da koristi samo ona prijevozna sredstva (vlastita prijevozna sredstva ili prijevozna sredstva u vlasništvu drugih pravnih i fizičkih lica koja su registrirana za obavljanje djelatnosti prijevoza putnika) u kojima su putnici i prtljag osigurani (putničko i zdravstveno osiguranje).
- Stav (3) istog člana Pravilnika propisuje da pri realizaciji putovanja moraju se koristiti autobusi odgovarajuće starosti, tehnički ispravni i pregledani, pod uslovom da njima upravljaju lica, koja ispunjavaju zahtjeve u pogledu profesionalne obučenosti i kompetentnosti i za koja Agencija školi dostavi pisane dokaze o psihofizičkoj sposobnosti za upravljanje autobusom (tahografske trake za prethodna dva dana), za vozače koji su angažovani za prijevoz učesnika određenog oblika odgojno-obrazovnog rada.
- Stav (4) istog člana Pravilnika propisuje da su zahtjevi u pogledu starosti autobusa (kao



najčešće korištenog sredstva za prijevoz učenika) sljedeći: a) za putovanje na teritoriji Kantona Sarajevo moraju se koristiti autobusi koji nisu stariji od petnaest godina, b) za putovanje na teritoriji Bosne i Hercegovine moraju se koristiti autobusi koji nisu stariji od dvanaest godina i c) za putovanje izvan Bosne i Hercegovine moraju se koristiti autobusi koji nisu stariji od deset godina.

- Stav (6) istog člana Pravilnika propisuje da zahtjevi u pogledu tehničke ispravnosti autobusa podrazumijevaju obavezu Agencije da osigura, te pravo i obavezu škole da zahtijeva, prije realizacije putovanja dostavljanje pisanih dokaza o tehničkim pregledima autobusa koji se koriste za putovanje (redovni tehnički pregledi u posljednjih šest mjeseci i tehnički pregled obavljen ne ranije od pet dana prije putovanja).
- Stav (9) istog člana Pravilnika propisuje da direktor ima obavezu obustave početka putovanja, ako nisu ispunjeni svi uslovi u skladu sa ovim pravilnikom, te ako utvrdi da prijevozno sredstvo nema dokaze o ispunjavanju navedenih uslova u pogledu tehničke ispravnosti, potrebnog broja sjedišta i odgovarajuće udobnosti, kao i u slučaju kada je očigledno da je vozač u takvom psiho-fizičkom stanju da nije sposoban sigurno upravljati vozilom (alkoholiziranost, umor, bolest, djelovanje opojnih droga ili lijekova na kojima je označeno da se ne smiju upotrebljavati prije i za vrijeme vožnje) o čemu će obavijestiti odgovorno lice Agencije, Ministarstvo i nadležni organ Ministarstva unutrašnjih poslova.
- Član 100. stav (2), tačka p) Pravilnika propisuje da su prava i obaveze škole osiguranje sigurnosnih aspekata realizacije odgojno-obrazovnog rada van objekata osnovnih i srednjih škola Kantona.

Slijedom navedenog, Ministarstvo cijeni da je uspostavljen standard praćenja kvalitete i sigurnosti dovoljan okvir za navedeno.

Takođe, informišemo Vas da su odredbama Zakona o osnovama bezbjednosti saobraćaja na putevima u Bosni i Hercegovini („Službeni glasnik Bosne i Hercegovine“, broj: 6/2006, 75/2006 – ispr., 44/2007, 84/2009, 48/2010, 18/2013, 8/2017, 89/2017, 9/2018, 46/2023, 88/2023 i 35/2026) (u nastavku teksta: Zakon) utvrđeni osnovni principi međusobnih odnosa i ponašanja učesnika u saobraćaju, te druga pitanja iz oblasti bezbjednosti saobraćaja na putevima koja su jedinstvena za cijelu teritoriju Bosne i Hercegovine.

Član 7. Zakona propisuje da su preduzeća, ustanove, pravna ili fizička lica i drugi organi koji posjeduju vlastita vozila dužni da se brinu o tome da vozači njihovih vozila ispunjavaju propisane zdravstvene i druge uslove za bezbjedno upravljanje vozilima i da obezbijede da njihova vozila budu ispravna, te da imaju propisane uređaje i opremu.



Član 173. Zakona propisuje da vozač koji je u tolikoj mjeri umoran ili bolestan, ili je u takvom psihičkom stanju da je nesposoban za bezbjedno upravljanje vozilom, kao i vozač pod djelovanjem opojnih droga ili drugih opojnih sredstava ili lijekova na kojima je označeno da se ne smiju upotrebljavati prije i za vrijeme vožnje, ne smije da upravlja vozilom u saobraćaju na putu.

Član 174. stav (1) Zakona propisuje da vozač ne smije da upravlja vozilom u saobraćaju na putu, niti da počne da upravlja vozilom ako je pod djelovanjem alkohola.

Dalje, član 197. Zakona propisuje da pravna i fizička lica koja zapošljavaju vozače ne smiju da dozvole da njihovim motornim vozilima upravlja vozač koji nije obavio redovan i vanredan zdravstveni pregled na koji je upućen.

Član 219. stav (1) Zakona propisuje da se redovni tehnički pregled vozila obavlja jedanput godišnje. Stav (2) istog člana Zakona propisuje da se preventivni tehnički pregled vozila obavlja nakon proteka šest mjeseci od redovnog tehničkog pregleda vozila. Stav (3) istog člana Zakona propisuje da su preventivnom tehničkom pregledu vozila dužna se podvrgnuti vozila koja se daju u najam (rentakar vozila), vozila kojima se obavlja osposobljavanje kandidata za vozače, vozila kojima se obavlja taksi prevoz, autobusi, teretna i priključna vozila za prevoz opasnih materija, teretna i priključna vozila čija najveća dozvoljena masa prelazi 7.500 kg.

Posebne mjere bezbjednosti definisane su članom 220. stav (1) Zakona, koji propisuje da ovlašteno lice može vozača ili vozača-instruktora da podvrgne kontroli pomoću odgovarajućih sredstava i aparata, ili da ga uputi na stručni ljekarski pregled radi provjeravanja da li ima alkohola u organizmu ili da li pokazuje znakove poremećenosti izazvane dejstvom alkohola, odnosno da li je pod dejstvom opojnih droga ili psihoaktivnih lijekova na kojima je označeno da se ne smiju upotrebljavati prije i za vrijeme vožnje.

S poštovanjem,



Dostaviti:

1. Naslovu,
2. a/a.

